

四庫全書

集部

欽定四庫全書

集部

陳白沙集卷六

詳校官庶吉士臣陳若霖

中書臣劉源溥覆勘

總校官檢討臣何思鈞

校對官中書臣湯垣

謄錄監生臣王寶唐

欽定四庫全書卷

陳白沙集卷六

明 陳獻章 撰

七言絕句

戊子秋開化吳廷介縣博校文於我省念太夫人
初度之辰在十月八日撤棘之後幸公程之便趨
歸為壽詩以送之

高下原從脚板分江山富貴幾般人吾家子弟官情薄
欲把行藏壽老親

題伍光宇碑陰

幾年滄海一碑成身後何須歎不平天遣老兄生少子

千秋寒食祭公瑩

兄伯饒近生一子為伍光宇後

喜黃在登科

半醒半醉一儒巾黃卷青燈二十春晚醉鹿鳴君莫訝

龍頭還屬老成人

龍頭還屬老成人夜半雷聲已變春莫為晨昏留不去

安車扶上白頭親

在有老母在堂故云

安車扶上白頭親徐積當年也為貧憶昨扁舟淮上路
青山吾拜墓中人

題松雪圖

元時有個趙松雪松雪于今又屬誰一幅丹青一瓢酒
廖公來乞老夫詩

半江十詠為謝德明賦

江湖城市氣交吞誰放蘭舟繫柳根肯與漁翁通水界
白頭破浪在江門

獨速溪邊舞短蓑月明醉影共婆娑手中握得桐江線
釣破江天不要多

水面烟濃白鳥低數峯青鎖夕陽西隔波莫是仙源否
恰到波心路已迷

隔波晴色裊孤烟萬樹桃花錦一川夜半天風吹海立
探花人在半江船

水到江心五百弓白鷗雙起雁孤衝竹篙點碎菰蒲月
如此風光我共公

畫紙敲針一杜詩
水生花落兩天機
西風捲市塵高起
也到江心不解飛

溪槎汎汎月中眠
橫占波間一半天
何許少年三五輩
夜深隣舫叫攤錢

碧海雲深鶴夢勞
人間無地著盧敖
不知居士曾來否
試向波心問小舸

醉則高歌醒復悲
老仙那有獨醒時
江間波浪三千頃
都與回公入酒卮

半江秋水映斜陽
幾個神仙坐水旁
酒是逡巡花頃刻
一尊韓愈對韓湘

經陳氏家廟

牡蠣牆高一廟深
緣岡松栢晝陰陰
我家俎豆茅茨下
只少黃金不少心

題萬松庵壁

昔年曾賦萬松軒
一飯松根有俗緣
旋摘黃花傳白酒
真成東老對回仙

過東涌

周貢士抱乳
兒久住出逐

鄉曲論交大父餘耳根狼籍病翁書小兒莫道無靈性
也傍寒塘望笋輿

經曝日臺

周鎬所築鎬亡
無子止一女

何處猿聲更斷腸夜聞孤女哭淒涼淚痕滴著臺旁樹
縱到春風亦少芳

寄袁暉林敬

頗憶江湖林子翼小齋留飯更袁暉人心人面人人異

賢輩如前共飯時

南州香櫃久流傳亦賣東湖草屨錢莫共諸賢理鉛槧

只治香櫃過年年

暉治香櫃自給
近為社學師矣

歲首詩緘寄草梅路傍先倩秉之開而今兩眼西風淚
誰解傳聲到夜臺

若道鷓鴣夷解了心五湖何用更千金魯連長揖平原去
風月無邊碧海深

林緝熙縣博張廷實進士何孝子子完先後見訪

既而緝熙往平湖廷實歸五羊子完還博羅因賦
四絕

春水江門一葉舟
幾人來此看垂鈎
浮雲一散無踪跡
飛盡桃花江水流

昨夜江門把春酒
滿船明月唱陽關
五羊城中消息斷
君去東吳幾日還

四百峯頭白鶴知
老夫八月有幽期
爾家正在羅浮下
莫向春風怨別離

長髯遺我一囊山鐵橋流水非人間我今決策山中去
踏斷鐵橋無路還

夢遊天台

路入天台第八重洞門剛與赤城通脚根點到虹橋下
一笑那知是夢中

伍伯饒送蜂窠至用韻答之

獨憐溪竹隱花叢待得南山後到蜂昔日往來南谷口
如今只用一丸封

晚蜂隊隊過山房何處歸來嘴脚香
辛苦奉君臣子分
可堪奴輩日偷嘗

賽蘭花開

晴光三日轉花枝坐對微馨忽有詩
涓滴未嘗花上露
南風莫只報人知

曲欄砌下少人窺戲蝶遊蜂忽滿枝
君欲尋花須早計
只今猶是未開時

微風中袂細氤氳楚畹叢中別有春
啜茗亦嫌風景殺

明朝載酒是何人

山花豔豔綴旒傍君愛深紅愛淺黃楚客見之揮不去
向人說是賽蘭香

次韻南山送蜜

萬古西山朽骨叢中有魂魄化為蜂餓死空窠不飛去
猶為君王守故封

寒花索寞不成叢口腹吾慙入臘蜂覓蜜嬌兒啼夜半
未成新釀又開封

知從何處宿花叢清曉飛來又幾蜂
定有香魂招不返
遠尋芳氣落花封

處處山花好蜜房
綢繆巖壑為誰香
相思道遠無由寄
此味年來只獨嘗

戲贈館賓

松風和雨灑柴關
過午雕胡飯始飡
今日華卿休怪訝

往年飢鼠嚙陳山

嘗館
白沙

讀林進士信宜祭母墓文

卷六
淚血今朝灑鳳山鳳山元只在人間非關旅殯無尋處
不與皇華共載還

天涯四尺不封墳一去鳳山三十春莫辭更向山前問
恐有漁樵是異人

袁侍御道龍川訃至

何處龍川去不歸山南山北雨雲飛晚風晴捲三千尺
好與歌筵作舞衣

憶昔青陽動海濱隔年草木預知春如今行路無顏色

盡是青陽去後人

次韻柳渡頭答鄉友

溪南溪北荔枝垂五月荷花欲捲旗忽有酒船邀半路
三杯不記主人誰

飯罷雕胡坐石磯白雲閒與鶴同飛神仙若道吾無分
那得身輕減帶圍

題林進士廷玉繼母陳氏挽卷

廷玉幼好嗜醬薑其母每求於旁舍

給之

與兒醬薑兒勿號前母生之後母勞大統岡頭寒食酒
一杯和淚灑香茅

五月菊

露飲霜食不記秋黃花三昧室中求區區形色多相似
爭得先生為點頭

小變春紅作淡粧山亭初見一枝黃醉中忽眩東籬眼
起視金錢著屐忙

二頃南風秫正青督郵未到長官亭眼前雖有黃花在

不與陶公解醉醒

題梁景行天壺書屋

打土編茅費幾錢
白雲深夜一燈懸
知君未是壺山主
只借壺山過兩年

糞粥朝朝長白寺
衣冠夜夜百原山
三年枕席何曾設
一紙家書亦不看

元夕

村南村北此宵同
好景難消一老翁
在處恐妨年少樂

踏歌歸去月明中

正月菊

春到東籬花亦知紅桃白李更當時東風自領芳菲去
也為秋香作意吹

廬阜高歌九日杯盡將秋意放花開誰教也向東風裏
點破千紅萬紫堆

次韻吳縣博別後見寄

聖賢生處是中華何處天涯何處家夫君認得幽棲處

江門月底釣魚槎

昨夜江門詠月歸
今朝又領衡山詩
千仞岡頭一振衣
乃見廬岡點化機

題一峯遺墨後

何知卷

穆穆熙熙在眼中
君家卷裏忽相逢
蒼烟綠樹湖西路
何處金牛弔一峯

何生告還新喻
因憶希仁先生
平生故人不相見
十有六年悵然
有作附生
它日見之為我道之

忽忽人間十六年與公信息兩茫然不知今日江門路
還到湖西是幾千

淵明愛菊

白衣剛到黃花下醒長官為醉長官社裏新知僧酒主
門前高枕石蒲團

和靖愛梅

懊惱梅花未有詩孤山馬上又攢眉後人拈出前人句
作者元來自不知

茂叔愛蓮

不枝不蔓體本具外直中通用乃神我即蓮花花即我
如公方是愛蓮人

潘岳愛桃

潘郎本自愛桃花種向河陽幾萬家世有長官如孟子
還除花地付桑麻

廢宅逢梅

花間無主竹籬空小徑斜穿曲巷通賴是暗香能不息

短筇破帽得相逢

與客夜飲

擊節歌聲未出門
照書燈火已眠尊
老妻喚醒蒲團夢
更與殷勤煮菜根

辭徵文者

平生語默鬼神知
破戒隨人老可媿
三日裹糧無此客
手攜空卷下階遲

崔潛送菊坡先生遺像至適鄉人送紫菊一株遂

以答之

高風千古鎮浮華
儼酌寒泉薦菊花
江上一株紅帶雨
丹青同日到山家

舫子

此身天地一虛舟
何處江山不自由
六十一來南海上
買船吹笛共兒謀

木犀

曉枕東窗睡不來
木犀造次隔離開
阿田小孫名也拍手黃

鸚到寫盡春風得意杯

東風披拂滿林塘
脚債東山也未償
捫虱不禁春意動
日華初吐木犀香

茗碗朝朝怕侍兒
采花莫采稱心枝
床敷愛就東窻暖
分付東風敵面吹

人間花草鬪春肥
粉蝶黃鶯接翅飛
也愛白頭肝肺好
木犀墻下噉朝暉

名花得見太平年
擊壤聲高壓管絃
化日熙熙春蕩蕩

華夷何處不同天

白頭無酒不成狂典盡春衫醉一場只許木犀知此意
晚風更為盡情香

書易隱求銘旌後感而有作

一題八字八低回滿眼淒涼筆下來春社去年人不見
茅簷燕子又飛來

山林交分晚相投詩在寒江紫菊舟君去落英還對我
獨吟春雨看江流

半雨半晴鶯亂啼溪邊丈人還杖藜不見舊時遊走伴
白頭衝雨更衝泥

移海棠花

小朵輕紅帶雨香柔條深翠引風長道人不是看花客
肯把墻隈借海棠

曉飲忽醉擁禪衣坐睡

三杯過卯得膏騰坐擁禪衣問殺更下砌握刀山竹冗
開門負水海棠生

弄筆

白日一醒塵土夢青山誰計鬪髒春時當可出寧須我
道不虛行只在人

弄水忘歸真灑脫看山扶步小逡巡等閒未許丹青手
搭颯平生畫此中

鴝鵒育雛于貞節堂東壁壁高且危二雛墮地下
乃就而哺之悲鳴徬徨如在無人之境予憐之取
雛納之巢紀以是作

將雛無力上椽題聲斷殘陽翅忽低高棟托身君亦悞
鷓鴣安穩只卑棲

海鷗來往未忘機鷓鴣能言掠砌飛母去巢危雛落盡
銜蟲巢畔待雛歸

江上

遲遲春日滿花枝江上羣兒弄影時漁翁睡足船頭坐
笑卷圓荷當酒卮

有懷故友張蕪素

穆穆熙熙只此風今人未見古誰同意中
我了牛醫子且放山齋水墨中

長安風雨閉門間陌上浮雲沒馬鞍
從此江西人勿論夫君高只比廬山

萬里長安看我病夜闌兩馬出攜燈
如今只有西涯在宿草江邊露滿塋

何宇新赴南京來白沙告別云此行且復見定山
時秋已盡矣以詩送之

孝子已為人所稱世間留者乃何情故鄉莫作多時別
阿母墳頭草又生

浦口柴扉幾日開江門烟艇暮秋回交情亦似長江水
南北年年送往來

閱光宇傳

君艇君齋古所呼忘年忘病舜之徒莫言外史無憑據
曾見當時拉背奴

戲題顧進士瓊林宴圖

黃屋門前緩轡行上林花映賜衣明怪來老眼模糊甚
道是尋春杜少陵

梅花

湖上詩仙骨已塵江門半樹復撩人攜田拉畹朝朝去
江上田家秫酒新

雲隔溪扉水隔塵梅花留月月留人江門半醉踏歌去
紗帽籠頭白髮新

春風處處馬蹄塵岸北花神冷笑人二十四番紅紫醉

一番零落一番新

馬蹄懶踏六街塵
閒憶當年拄頰人
江海衣冠零落盡
梅花還對白頭新

精神交月不交塵
看到黃昏故可人
拈出孤山難狀處
一年詩債又從新

桃李安能踵後塵
玉妃全是耐寒人
瘦筇拄破梅村月
要看南枝出格新

梅塢風高不起塵
短筇聊立探花人
山塘水淺時窺影

喜與年光不鬪新

風遞微香洗渴塵
獨行山路不逢人
梅花歲歲還依舊
只看何人著句新

詩思梅花兩絕塵
破窻殘月夜窺人
明朝走馬東西去
壁上空留醉墨新

雪崖江畔杳香塵
天與孤高遠俗人
不忘滄波別時意
一枝還遣到圖新

次韻廷實進士送倫長官出遊

我夢名山為點頭
名山到處是真遊
床頭買酒黃金盡
那向長江更買舟

新年田家

古田同井今同村
同坐杯盤到子孫
合是田家愛元日
白頭拄杖拜人門

麥秀夫於城南小渚中累土結茅居之容一之馬
伯幹取酒共醉桃花下各賦詩為樂秀夫謁余同
作附其韻

春江淡蕩桃花潯絕岸回風落醉金一路潺湲烟鎖斷
無人知道此溪深

川練縈紆島上花世間遙望出城霞仙源不比函關路
老子來時坐一槎

我夢桃花何處潯水清蘋白一籬金美人家住紅雲島
欲往從之江水深

手拄藤枝鬢插花夜收沆瀣曉飡霞貴人已隔門前水
野老還通月下槎

紅白花開綠渚潯風光買我不論金輞川不借閒人看
只愛詩家著語深

漠漠春烟淡淡花竹邊孤嶼閣飛霞春江水滿秋江水
更著新槎換舊槎

安期只在海東潯何處名山浪鑄金欲向桃花問消息
柴門深鎖碧溪深

武陵春盡水流花洗却耶溪十丈霞晝坐竹根看未足
滿蓑明月夜縈槎

東潯披卷盡西潯海水秋連萬頃金
卷裏我能題百首
溪蓬斟酒莫辭深

閉門春雨可憐花誰共
花前傾紫霞但放此杯深似海
回公肚裏得橫槎

得倫長官詩疑其果於遊而未可以遊
次韻復之
一百青錢解杖頭
樽中有酒勝閒遊
門前春浪高於屋
莫向長江弄破舟

短檠細字寫蠅頭
衰老而今尚好遊
何處與君談半偈

金史四庫全書
卷六
玉臺留作濟人舟

贈張進士入京

五年不出獨何心
萬里行囊又一琴
難寫別離今日意
江門春水不如深

有心誰莫弄兒嬉
孔老枝條我亦知
風日小塘君不顧
竹林藤簟自皇羲

能將糟粕委諸書
影響人間不受驅
五百年中名世出
先王政教果何如

津頭日暮送夫君別意那堪更遣聞芳樹鳥啼山雨過
柴門空閉一溪雲

玉臺居士玉臺眠碧海三山病枕前君欲有為休問我
白頭世事已茫然

會餘湯餅欲春闈往即公程亦不難不獨有官兼有子
老親贏得一開顏

南風吹上石門舟又到西華寺裏遊記得聯舟此相送
而今空有雪盈頭

昔曾寄住長安寺
潦倒滄溟夢不回
何處思君還有夢
青山斜日兩徘徊

次韻東所送薑酒

寧知生蚤與生遲
真鳳真麟出以時
何處氤氳薑酒氣
香風吹入野人卮

病起朝天果未遲
出門剛遇鳳來時
兩山居士何如喜
一飲從教累百卮

與廷實看李世卿題竹

來看竹上舊題名已有清風挹世卿
天矯龍蛇不堪捕
安知不是野狐精

題熊氏桐軒

湖海逢君四十年破琴殘韻尚依然
棹歌本是閩南調
傳到于今更不傳

桐軒云是勿軒孫何處江湖何處村
古錦囊中風韻在
幾時彈向白沙門

飲馬氏園贈童子馬國馨

日轉芭蕉雙竇鳴飛飛蜂蝶喜新晴
衰翁醉臥溪園裏

一曲春牛和國馨

六歲能誦予春牛之句

白髮跣趺溪樹根還從地主見
諸孫醉中自唱漁家傲
擊碎花邊老瓦盆

喜晴

西林收雨鵝鳩靈卷被開窻對曉晴
風日醉花花醉鳥
竹門啼過兩三聲

得沈大叅時暘漳州發來書答之

前後題緘兩度收春風無雁過漳州青燈一榻南都夢
回首于今二十秋

悼舊

里中興沒一浮雲六十年中幾度聞只恨墳荒無祭掃

前村更有未封墳

何潛死踰十年
并其母皆未塋

馬文祥寄五氣朝元壚至

隱者年來少在山白雲幾片落人間玉臺小徑蓬蒿底
吾對吾壚盡日間

人間葦血共歡娛
誰作朝元五氣鑪
自汲山泉煮春茗
不留俗客魚江魚

合是神仙太乙鑪
旁通五竅似蓮珠
如何水火收功用
去問劉安下手初

眼前詩景浩相撩
何處丹鑪火又消
莫笑道人歸未得
秋風雲路幾扶搖

五月二十六雨

民謂二十五六
七日有雨主豐

時雨時暘歌帝力
今年今雨卜年豐
路傍酒價知天道

何處醉鄉眠此翁

六月一日不雨

民謂此日
有雨主旱

窻眼陰晴曉未分一年憂樂稍相尋
山林自慣清涼極且放今朝到鑠金

圖新書舍中植蕉數本壁間李世卿題句潮州饒
鑑至讀之有所興起勉以小詩

一寸芳心卷却春竹枝遺響落圖新
潮州客子來何暮還對芭蕉索楚人

贈梁景行赴春闈

宗烈平生讀書處老夫題作小壺山壺山不解留君住
君著壺山夢裏看

夢亡友袁德純侍御

再試宜興割雞手置之栢府公巖巖如何不返龍川駕
遺恨千年在嶺南

自別君來十九秋江門暮雨忽相投當時呼酒留君語
却到于今羨海鷗

周侍御文化將訪白沙阻風江上連日以詩迓之

長風不打畫船回更為山靈掃玉臺走馬城中具茶果

青天白日繡衣來

積雨是日
得大霽

將晴積雨此何時我病山中久不知驄馬今朝在何處
江邊人吏望旌旗

昔者吾聞周柱史青牛紫氣出函關有心來鼓南溟枕
信息朝來已到山

懷胡大叅希仁

魯連謝去都無事
范蠡歸來未了心
三十餘年窮學道
而今方識古人深

先生齒髮今如何
我髮秋來白又多
若與先生論出處
江門只好聽漁歌

梅下雜詩

虛名每被詩家賣
素艷常遭俗眼嫌
聞向人間非得計
移根天上白龍池

向暖南枝已播詩
北枝向冷尚遲遲
肩輿欲過江門去

爭得春風剪拂之

梅花信是菊花傳
賞到梅花又一年
處士豈非詩俊傑
長官元是酒神仙

題瑞鵲卷

序云成化九年余被薦入京過江浦訪孔賜莊先生先生送予揚州偕行至六

合縣經宿而去當是時周君文化令六合有聲後八年莊先生病猶臥家予乞終養歸侍下亦衰且老周君以監察御史按治吾廣過寒舍道舊於是周君舉莊先生昔者所為賦瑞鵲詩俾予和之

瑞鵲多年我眼中
笑烹牛鼎夜燈同
如今栢府開詩卷
還對樽前兩病翁

贈化州守鄭順解官歸

湖上鷓夷久買舟清風明月幾宜休未知進退存亡事
只問歸來鄭化州

贈羅梁還程鄉

一峯諸子在通家生死交情俗可嗟泉壤有知開口笑
江門來去看梅花

飛出一帆何處風道人眠處玉臺東春光一路相隨去
朝雨渡頭花欲紅

世道如今覺我非，衝寒猶肯到柴扉。
江門春酒無多少，須勸羅生一醉歸。

翩翩雙屨一長筇，意氣憑凌四百峯。
肯向程鄉留一載，長官真好主人翁。

一客三旬住玉臺，梅花正傍玉臺開。
客心暗與梅花契，去到明年臘又來。

蓬島烟霞圖贈羅定直

一峯先生之子也

丹青誰弄烟霞筆，題贈湖西公子行。
攜過羅浮莫開看。

羅浮怕有異人爭

輓林別駕汝和

昔歲逢君在鬱臺揚眉撫劔泰山摧紛紛白眼輕豪俊
只有余公解愛才

別駕一城聊塞北短檠諸子自江南平生抱負何由見
塚上銘詩仔細參

赤岡經雨草萋萋山北山南路欲迷怕到使君投轄處
黑雲堆隴鷓鴣啼

有時江畔倚秋藤，裊裊如聞擊楫聲。
春色眼前人不見，江花江水總含情。

大田看山

春泥沒屐大田潮，溪北初經獨木橋。
千丈峯頭望東海，三山正對杖頭瓢。

縣取脚色

蕭蕭白髮映春漪，脚色年來自不知。
滿眼江山難具報，只將年月載公移。

炒蜺憶世卿

蜺酒三鍾一曲歌
江邊長袖舞婆婆
如今歌舞人何處
慚愧春鐺蜺子多

奴拾枯枝給早炊
鐺中風味此奴知
春風解憶江門否
正是江門蜺賤時

雨中漫興

種桃之歲在單闕
種竹如今又幾年
竹長桃枯人老去
釣船春雨日高眠

急起翩翩白鶴雙
黑雲將雨欲迷江
人間未有高樓地
何處深山著老龐

問厚郭胡父子起居於其鄉人蘇

居隣厚郭一雞飛
桂樹于今大幾圍
老憶舊時燈火伴
青山何處望霏微

讀宛陵先生歷覽昔賢皆泯泯
尋思魯叟自波波
几上凝塵封玉軫
南風不入琵琶引
仲由言志夫子哂
當泯泯時須泯泯

著漁蓑了唱漁歌受制江山老奈何溪上女兒閒抹鬢
東塵西市走波波

泯泯波波世與身都官兩語到頭真後生更把遺詩笑
公亦人間半醉人

波波泯泯不同時靜久無憂動輒疑聖人坐北吾遭逸
天下蒼生怨望伊

次韻羅明仲先生見寄

白頭一枕小廬山偶寄孤松十竹間朝市山林俱有事

今人忙處古人閒

高軒頻過武夷山
曾聽仙歌九曲間
坡公莫被山僧笑
只得今朝半日閒

誰輕朱紱愛青山
回首波波泯泯間
萬籟無聲天宇靜
先生還似老夫閒

三月啼鶯正滿山
傍花隨柳水雲間
古來曾點稱如許
不是天公不放閒

武夷碧水照丹山
按部時還到彼間
東坡也被山僧笑

只得今朝一日閒

偶閱岳季方題商山四皓圖次韻

道窮夫子不東周
歷世紛紛講智謀
四老若將三傑比
真成飲水勝封侯

水墨誰將畫此圖
山人搔首看盧胡
花水諸峯流落盡
白雲猶為隱屠蘇

虎困龍疲戰兩間
孤標千丈起商顏
不將老眼看人世
肯為留侯誤出山

定惠安劉理不難紫芝歌已動長安試將脚色從頭看
高祖如何敢溺冠

閱周溪圖作贈劉景林歸呈尊甫翁肅庵程鄉令

太極無階不可躋却從樓上望周溪

周溪書院在太極之南旁夾兩樓

天泉

井名在書院兩旁

十丈無人汲雲谷

亭名在太極之東

老翁來杖

藜

月色溪光盞兩楹酒醒開眼得蓬瀛試問老仙誰接引
春陵雲谷兩先生

兩仙何處舞霓裳
天上人間思渺茫
脚底飛雲三萬丈
隨君不得到程鄉

水北原南秋更多
滿川明月濯纓歌
長官要結溪山好
去問南昌乞釣蓑

東白張先生借予藤蓑不還戲之

月下溪邊逐影行
還聞何處瀉溪聲
扶君直到源頭看
七尺芙蓉贈一莖

咫尺溪光谷口分
谷中人語隔溪聞
明朝更下山亭去

溪上清風可送君

丁明府置莊蕭二節婦祭田邑人訟而奪之

歲月人間豈待深等閒興廢遞相尋祇應節婦墳頭月
還照當年茂宰心

贈晉江掌教陳昌期赴任

身為五典三綱主官作司徒典樂看教授蘇胡元有樣
莫將資級小儒官

村晚

漁笛狂吹失舊腔
采菱日暮鬪歌長
老夫獨面東溟坐
月上孤琴未解囊

對菊

溪遶廬岡宅遶沙
眼前酒伴眼前花
登高此地從頭記
三十六回無孟嘉

因花催酒酒催詩
詩酒平生兩不虧
秋到若無詩與酒
看花元似不曾知

菊徑旁通水背村
秋光蕩漾短籬門
與儂別樣何粧點

笑插金英滿鬢根

映山映水兩三叢移上山亭愛殺儂千古冷香吹不斷
長官頭上帽簷風

籬前水色映花光來坐漁竿弄晚芳西北酒姬解人意
問人沽酒壓糟嘗

代簡答吳撫州次定山韻

何許蒼生望不休翩翩皂蓋擁諸侯定山也未忘情在
更把黃州贈撫州

送子長還玉臺蕙懷林緝熙張廷實

十里崖雲古色黃
白龍高映玉臺光
山僧莫信閒饒舌
那得神仙此處藏

山肯留人月肯留
好山好水好人遊
誰還望見羅浮影

疑殺平湖五字謳

緝熙遊圭峯詩
云是個小羅浮

來時溟溟許同科
曾聽圭峯踏月歌
今日君騎地官馬
白雲招手奈君何

贈袁暉用林時嘉韻

白首看雲共此臺
青山明月小遲回
何時得見春風面
更到明年二月來

風雨相留更晚臺
邊爐煮鱉餞君回
扁舟夜鼓寒潮枕
又是江門一度來

植竹為垣土作臺
野橋分路到溪回
江門若比瞿塘水
何處遊人肯上來

青山依舊鎖溪臺
前度遊人去不回
賴是山人無訴牒
有人真本賣山來

冬至日示袁暉用前韻

面壁山人不下臺，老陰消盡少陽回。
白雲影盡千峰裏，紫菊香騰十丈來。

袁暉久在白沙，候容貫不至，以詩來和之。

冷雨淒風寄我臺，香林草屋夢空回。
山中酒伴何曾見，水上詩瓢只謾來。

擬於精舍旁結小庵，以處袁暉。

精舍巖西擬一臺，松高竹密路斜回。
草庵半屬袁郎了。

好帶茶園一櫃來

次韻贈胡曹

梅塢傳觴是偶同
小桃催放數花紅
人間愛見春風面
天上還看斗柄東

今雨到門君又同
四人對飲夜鑪紅
眼前莫道東溟遠
我欲乘槎更向東

答蔣方伯

筆下橫斜醉始多
茅籠飛出右軍窩
如何更作山陰夢

數紙換公雙白鵝

得蕭文明寄自作草書至

草聖留情累十春
熙熙穆穆果何人
如今到處張東海
除是譚生解識真

魏晉名家是一闕
前驅黃米未知還
却疑醉點風花句
四海于今幾定山

東茅十丈掃羅浮
高榜飛雲海若愁
何處約君同洗硯
月殘霜冷鐵橋秋

送柑答之

遺我紅柑索我歌，狂柑不飲奈柑何。
大崖山下無人寄。

日盡千瓢舞破蓑。

大崖世卿讀書處也。

雙鳳石

在七星巖其一為好事者取去族子冕以書來索題。

雙鳳巖棲豈遠而，玉臺西望斗光垂。
蓬萊水濶無因到，願借山人一隻騎。

鬼鑿寒巖萬丈開，翩翩雙鳳忽飛來。
而今石化孤鸞在，何處人間去不回。

龍山吟走筆和陳冕

龍山氣魄小終南行者何年住此庵黃雲道人飛兩脚
也到白龍天際巖

何處龍山弔古墳忽傳佳句到黃雲始知佛是西方我
報答人間父母恩

老柱高擎何處天滴醯洗蘚認當年山僧猶話飛來日
撞破龍山一道烟

第一山人俗姓盧脚踰塗字也碑趺寺旁老塔依然是

却是乾坤種種無

浮生日月易消磨回首龍山月一阿想得當時盧行者
笑人又手縛諸魔

風雨江門罷晚墟隔船燈火夜呼盧驚回一覺龍山夢
閒對雲僧講地圖

次韻蘇伯誠吉士

魯水何剛愛一沂江門新浴試新衣長風夜卷殘雲去
公抱大江明月歸

我浴江門點浴沂
藤蓑自樣製春衣
尋常只著藤蓑去
細雨斜風釣不歸

喜楊敷至

笠影于今落海潮
十年雲水夢相撩
一雙我辦雲卿屨
萬丈攜君訪鐵橋

新年試筆

舍下水生春水開
竹間波弄碧洄洄
東風日日江門道
不盡官船打鼓來

對影

風月情真詩浩蕩
江湖水濶蓑飄翩
丹青不是江門影
又畫瞿曇又畫仙

雨中偶得

高浪張燈何處船
客邊風雨夜如年
行人自有明朝路
莫遣陰晴不屬天

題陶憲長畫唐詩圖

詩中之畫畫中詩
晴雪孤舟蕩晚暉
同在五湖烟水內

是鷓夷不是鷓夷

雨後觀園

二月平原水亂流
微茫生意盜初浮
黃茅翠甲驚人眼
是我曾無為草憂

僉憲莆陽李公自海南征黎過白沙

蛇窟縱橫木短弓
霜風何處捲飛蓬
清時欲獻征黎頌
血刃猶誇甲冑雄

飲名酒

徐孺眼欺湖水碧
龐公心死鹿門深
尊前水月千千頃
手上絲綸萬萬尋

觀競渡

快意深時恨亦深
干戈何處不相尋
誰將五月龍舟水
盡洗中原虎鬪心

贈茶園何視履翁

讀易溪邊日已斜
晚風吹落釣魚槎
江門水月真無限
也照先生帽頂花

題王廷直畫

曲肱帶酒眠花間有月穿松到我前人去華山今已久
丹青猶畫在山年

贈畫師

高枕松根不記秋秋來春去幾時休山中此夢公能畫
我有黃金贈一舟

次韻馬廣重過白沙

綠榕陰裏早秋天又借漁翁半日眠三度槁梧攜過此

如今不記是何年

陰晴十里不同天
獨樹溪邊看雨眠
何處引杯歸未得
相思真有日如年

葵山小睡次韻謝天錫

閒到忘閒始是閒
閒中消得幾葵山
曲肱枕斷踈桐影
夢遶白龍池上還

無心可比白雲閒
白雲被風吹出山
道人肯比桃花水
流向人間更不還

送劉程鄉遊玉臺

春草楊敷曾醉處
秋風又拂長官衣
黃雲不是棲賢地
纔到黃雲便說歸

癸山受諸持齋者拜戲作示之

山花山鳥共諧嬉
山石危橫步不知
笈領頭陀稱老宿
真成老子是嬰兒

次韻張別駕古勞望白龍池

一泓何處瀉天池
泡沫君看水面漿
若對崑崙修缺典

數篇休欠白龍詩

睡起

天地蜉蝣共始終十年痴臥一無窮
道人試畫無窮看月在西巖日在東

候方伯東山劉先生

幾處龍光發夜函畫船信息滿東南
津頭小吏殷勤報坐爇爐香月底庵

贈夏進士昇

春日春風江漾沙官船不發對山家山杯一舉山翁醉
笑點青藜數岸花

顧別駕欲人以號稱不以官口號取笑

別乘官高上元簿夫君英氣蓋東南何須不學程明道
只要人稱顧勉庵

書稱顧別駕勉庵別駕詩以博笑

勉庵別駕今相隨書法魚之蓋亦宜若道是名皆外物
因君分別却生疑

顧別駕來教民板築復以詩見示次韻奉答

斛板親傳易簡方旁觀點點復行行無人不拜先生賜

茅屋家家是土墻

莆中呼板築之具曰斛板

宿雲臥軒

世間何喜復何悲風雨蕭蕭過短籬小睡正酣童子問
公今是夢是醒時

不妨到處與人羣借宿山齋酒半醺我得五龍傳睡法
枕痕猶帶華山雲

了無意緒向諸緣到處茅椒可借眠白日與人同在夢
不應疑我是神仙

讀漳州張太守功德碑

罷守三州臥兩山漳州面目此碑間郡人欲識蒙庵老
也傍斯文捉一斑

次韻黃澤飲酒見寄

南山北山花笑人有酒不肯延佳賓請君試向西園看
又減黃鸝一半春

拚飲如何更問人樽前不見李元賓
晨朝有酒晨朝醉
莫待黃昏老却春

謁鄧家山墓

擲谷鶯聲向此沉
遠墳春色為誰深
紙錢灰冷桐花落
已被愁風捲到心

送扇與萬松庵

山中團扇織朱藤
小把還誇入手輕
見說高齋蚊嘴赤
夜深來撲老先生

次韻劉方伯東山見寄

一為雷雨沛西東十郡民歸岳伯功
我有江門水千頃春來只好浴鳧翁

松隱輓詩

薛廉憲父也

清靜忘機樂未休水風何處弄浮漚
典刑今在山頭月曾照踈松枕畔秋

送薛廉憲江門

江上看雲獨送君廬山雲亦華山雲
鮮衣半晌雲中坐

纔出雲來路又分

無端聲色謝盲聾多少人心弊弊中萬里青天今日送
江門津口一帆風

東山於我問漁磯君見東山詠我詩莫共越人謀出處

直夫先謝外臺歸

東山劉時雍也陳壯字直夫江西僉事山陰人

謝東山惠廣西酒

月下花前舞影歌桂江酒美獨斟時眼前莫道都忘却
也向東山有報詩

李評事題其弟世卿詩卷曰采菊蓋取予贈世卿
古詩首句語名之因題

是處江山有釣蓑相逢休要問如何閒吹黃鶴樓前笛
即是廬山采菊歌

次韻世卿再至白沙

脚底白雲無定方風流到處賀知章這回却是無人見
走共漁翁酒處藏

茂卿評事惠扇答之

時世卿
在館中

遠望不見大厓山君家兄弟果皆難不知風動今多少
也到先生掌握間

度楚雲臺前小橋

一木欲度溪岸高江門丈人放步牢脚底太行開幾片
秋風隨處灑鴻毛

用前韻答張直兄弟助修楚雲臺

託契青蓮意便高千秋分付此臺牢先生醉拍蓆床笑
笑殺楊朱斬一毛

卷六
偕一之世卿詣楚雲臺偶作呈世卿

小立三人靜楚雲
水田漠漠向秋分
千峯笑指來時路
黃鶴樓前月是君

半床明月半床雲
光景行窩到幾分
眼角東溟秋一片
邵堯夫也不如君

代簡奉寄邱明府

何處思君獨舉杯
江門薄暮釣船回
風吹不盡寒蓑月
影過松間千丈來

寄廷實制中

東閣摩挲舊雨琴青山回首又秋深
制中面目今何似折盡寒燈半夜心

聞黃澤發解

笑領秋風第一花文章誰敢謗飛沙
狂歌欲買花前醉不怕無錢付酒家

和林子逢至白沙

一樣春風幾樣花乾坤分付各生涯
如今著我滄江上

只有秋香撲釣槎

秋夜楚雲臺小集贈俞溥

新秋有客來信豐風月此杯聊此同江山濶幅無人話
六七青袍一病翁

憶衡山呈世卿

身輕何處謝炊烟石洞松脂不記年尺牘已通南岳主
一丸還有白龍仙

今日山齋擁白綿幽懷抱膝又經年湘中憶我無歸路

更住衡山幾日船

楚山西望翠重重說著衡山便不同
九尺仙筇倚牆角待君來問祝融峯

曲肱何處枕湘流不到名山死不休
高詠祝融峯頂月與君當作逍遙遊

即事

照眼春光爛不收江亭一雨欲成秋
道人不是閒鶯蝶肯為陰晴一日愁

謫仙亭

遷客一亭眠海濱當時誰號謫仙人
花汀柳市無疆界盡是乾坤一樣春

世卿還黃公山

黃公椽子李家山水國初歸作夢看
愛殺在家兄弟好一壺春酒對承顏

謝金方伯歷

扣門驚睡雲霞曉洗手開絨日月新
莫笑土床空耐冷

薇垣又借一番春

聞周京春試下第遣黎公往報其家

浣壁小兒期大魁倚門慈母夢歸來春榜未登非惡報
開緘莫欠老黎杯

聞東山先生領都憲之命修理黃河以詩寄之

疏鑿分更日已多乾坤無奈一黃河天生會有龍門手
人世空傳瓠子歌

題山水小畫寄姜知縣

泉聲山色正邦心誰寄漁蓑渭水潄鮮點無中合有意
世間除是畫工深

送蔣誠之考績入京

塵埃局促非天遊大翼豈肯捨榆休王明受福在今日
野老放歌回白頭

沈石田作玉臺圖題詩其上見寄次韻以復

到眼丹青忽自驚玉臺形我我何形石田雖有千金貺
老子都疑一世名

得世卿永興書

山堂見月自鈎簾一榻秋光中酒眠何處博舟來嶽下
晚搖山影過湘川

方伯金公顧白沙次韻答之

晚飯對公山閣雨尊前又拜歲書新別來試把梅花數
三十六回江上春

題一峯傳稿後

一峯獨去江湖遠千古長留列傳新歲歲桃花滿東岸

只將榮謝記冬春

閔都憲惠歷

前歷將窮後歷新
臺端兩度拜山人
東西嶺外今何地
飛盡嚴霜是好春

送林時嘉

南川夢裏舊青湖
何處青燈一榻孤
留取幽禽守花月
隔林還與盡情呼

次韻陳冕

課試失期無了日酒杯勸影有長春風流倘帶龍門選
不愧當年第一人

西遊笠頂是青天每愛前村酒處眠秋雨閉門人不見
依稀猶記下江年

冕與張別駕約遊清淇

長江月色浩無津愛月撐江別駕真借問此來誰主約
翩翩猶是未官人

寄題邵西澗

澗裏仙蒲幾節來澗邊塵跡尚封苔
賒君澗水西頭月并與蒲香入酒杯

悼區孟章

序云章姓區氏順德人四十不娶棲迹空山委志逍遙漠然不知人世之欣戚

何如亦一奇士也

一坐虛寒誓不歸病危何處覓刀圭
青山若問君來去只有當年海月知

悼馬龍

序云龍從一峯先生遊頗見意趣一峯賦道南詩送之後為仕進累心遂失其故步

至不得一第而死亦命也夫人生幾何徒以難得之歲月供身外無益之求弊弊焉終其身而不知

返若林琰皆覆
轍可鑒惜哉

道南詩卷出湖西恨失當年馬上攜高枕何如一峯好
夕陽回首萬山低

次韻顧別駕留宿碧玉樓

序云弘治七年夏六月
按治廣東侍御熊公欲

創樓於白沙水湄為往來相接之地謀始事于我
郡主林先生遂盡聞於藩憲諸公議既定別駕以
按治之命來相地是夕宿
白沙碧玉樓遂次韻答奉

白雲滄海共悠然病榻年深別駕眠
領略可勝諸老意
一簾疎雨對江天

信宿留公豈偶然山中麋鹿避人眠
乾坤多少登臨意
一洞天深一洞天

一弛一張皆自然嘉賓未醉主人眠
兩鳩相對山樓午
喚得晴天作雨天

不相同處是同然三十年來辦一眠
何處白雲堪作雨
白雲封斷白龍天

勾引漁郎恐未然桃花巖下笑人眠
白頭我亦人間睡
不是桃源洞裏天

偶憶廷實遷居之作次韻示民澤

君將肝肺托諸詩我道溪山是外圍人或有疑容未信
已如深信不妨疑

小勝江山大勝詩斬關直出兩重圍自家真樂如無地
傍柳隨花也屬疑

湛民澤攜諸生遊圭峯甚適奉寄小詩呈文定上
人

天風吹入紫雲層高閣逢秋快一登多少傍花隨柳意

還餘一個玉臺僧

秋落遙峯翠幾層不知何處嘯孫登而今小坐黃雲看
誰道方袍不是僧

洞崖秋蘚碧層層奪竹穿松際曉登想得紫芝初入手
汲泉鑽火欲呼僧

閣天孤峙老稜層萬古荒臺萬古登君逐我來無記性
東坡言是德雲僧

山斗為羅一峯作

青天白日一峯尊
碧玉先生斂衽看
四海未知山斗價
一錢相售是君難

曲論迷真亦異哉
乾坤何代不生才
今誰敢避愚公號
曾作夫君北斗來

觀黎林坡先生畫像

羊裘不釣世間名
考蹟桐江更考情
散髮松根坐磐石
葫蘆無酒對先生

無詩無影不留真
描畫先生到幾分
賴有當年親點筆

一聲孤鶴在秋雲

次韻周憲副夢中見寄

黃花簪滿碧方巾已作人間了事人
籌策廟堂無我夢只將杯酒托經綸

金帶纍纍夢欲通庭柯忽撼夜來風
白頭相見知何日挑盡殘燈碧玉中

代簡答黃太守

韓山片石舊空聞尺札秋風此拜君
隱几獨慙非老手

得逢青眼看斯文

次韻廷實見示

擊壤之前未有詩擊壤之後詩堪疑
風花雪月人人是又墮風花雪月圍

騷壇處處自張圍我不操兵世莫疑
翠壁青林端有句傍花隨柳却無詩

寄題張主事小西湖次韻

咫尺波光對五湖滿城况是眼中無
山禽自鬪聲音好

來傍竹林眠處呼

人間風月幾西湖居士園中亦偶呼
千樹梅花一隻鶴
可曾認得主人無

龍江鄧翹送晚菊

氤氳何處送花舟
歲晚相看碧玉秋
笑把一杯花亦笑
年年公酒為花留

次韻送藤枕

萬事無心一片雲
再來西華打眠人
紫藤一枕誰分付

盡日酣酣紅樹根

悼陳冕

不飲亦狂飲亦狂醒中說夢醉中忘乾坤早暮蜉蝣化
不是芙蓉不耐霜

東方欲白星漸稀一場春夢曉鐘時伯道有子常事耳
劉蕡登科人不知

風入梅花遮少香月臨江閣有微霜去年此地客劇飲
此夜今年人悼亡

寄左行人

白狐可改先公墓我許還公尺券書漢老未還東白記
也憑門下一吹噓

左行人寄惠倭金酒琰醉中賦答

睡鄉元自醉鄉分醉興深時睡興深六十七回春又過
茅柴不管注倭金

劉景仁自雷州別二親還永豐過白沙贈之

何處寒笳動曉風江門別舸太匆匆半肩不是雷陽物

何得雷陽在夢中

與鄜筠巢求蘭

楚畹當年不盡花
每逢秋露憶君家
白雲只隔扶溪水
不使餘香到白沙

墜露聲殘楚水昏
一杯何處酌湘魂
山人口是遊蜂嘴
不到扶溪竹下門

次韻王樂用僉憲見寄

春到江門好放舟
放舟處處是天遊
能將公事此中了

何啻于今第一流

拍拍滿胸都是春一聲未唱已通神
新詩若道堯夫是只問堯夫是底人

謝生得京醜以為美使致白沙開幕視之空樽而已
乃因發一笑

十年美譽酒家聞屋裏茅柴且賞真
偶對泥樽開口笑先生不是醉鄉人

題李子長畫

青山影裏人家少，綠樹陰中石徑微。
偶出洞門回首望，白雲何處有柴扉。

谷靜山深樹幾叢，溪邊白石可青筇。
詩中此景多相似，只恐詩家是畫工。

寄鄧俊圭

韶州西去是衡山，楚客舟從嶺左還。

時李世卿取道廣西還武昌

欲

語祝融天上事，思君迢遞見君難。

予與世卿約遊衡山云候世卿歸途過樂

昌更與俊圭期定今不果矣念之悵然

外祖父無子以姪孫林廣為後廣之曾大父以一身兼兩戎籍不能辦而一之為子孫世後久之業盡人亡惟有廣耳有司今又以廣補北京鎮南衛伍自是而後林氏子孫在新會者無孑遺矣丘隴之守委之誰耶予力不能振之賦二詩贈廣庶有識而憐之者

茅簷家具盡隨身老婦嬌兒日可親有夢只尋丘隴去不須回首問耕人

淚盡廬岡失母家塚傍枯樹也無花平安莫遣無書信
一度春歸一度嗟

贈劉別駕肅庵解官歸永豐

西來雙棹不曾休再過江邊碧玉樓共說西湖歸去晚
客心應未死金牛

一蓑歸去釣秋江花近漁舟水亦香却笑此翁閒未慣
水中鷗影尚回翔

朱門誰道不如貧笑把狂詩寫贈人日暮孤舟向何處

野花啼鳥故山春

得廷實報定山謝事歸憶東白仲昭諸先生有作
也曾收拾定山書三月天曹謝事初見說定山長在病
當時不出意何如

當時不出意何如得喪難逃真數書更憶往年張學士
西山對面說河圖

西山對面說河圖遠志誰將小草呼今古聖賢不同調
各留一影落堪輿

各留一影落堪輿歎息乾坤幾丈夫脫贈藤蓑君亦愛
江門春雨憶皇都

江門春雨憶皇都個個先生六十餘必有嘉言告當宁
他年應得史臣書

題空夫卷為余行人作

三十年來學鍊空凡身猶在有無中到門有客求題句
不是空夫果是公

題吳憲副累葉傳芳卷

卷六
壺山八面照莆陽
吳氏傳來奕葉芳
莫向通衢高綽楔
只談世業教諸郎

答張梧州書中議李世卿人物莊定山出處熊御
史薦剡所及

德行文章要兩全
乾坤回首二千年
自從孟子七篇後
直到于今有幾賢

多病為人未足羞
遍身無病是吾憂
眼中誰是醫和手
恨殺刀圭藥未投

右李世卿

欲歸不歸何遲遲不是孤臣托病時此是定山最高處
江門漁父却能知

右莊定山

買舟南岳去尋醫七十今年病不支傾蓋獨憐熊御史
肺肝今徹野人知

右熊御史

鄧督府欲得慈元記上石答之

西涯許撰慈元記大手文章不要多拙作豈堪傳勝事
如今此石未須磨

東山規矩趙生成頃者一緘傳到京有廟未應無祀典
老夫重敢告先生

偶得示諸生

平地工夫到九層不如那個主人能他鄉消息無尋處
去問嵩山戴笠僧

江雲欲變三秋色江雨初交十日秋涼夜一簑搖艇去

滿身明月大江流

寄李世卿

衡岳千尋雲萬尋丹青難寫夢中心
人間鐵笛無吹處
又向秋風寄此音

永順彭宣慰世忠堂

宣慰之堂名世忠靈溪水與滄溟通
如今百丈高銅柱
又見兒孫起故封

次韻送林大叅之任廣西

病裏逢春實怕春對花著語未驚人今朝縱有狂詩送
不是當年翰墨臣

東西嶺表非無事經濟術中怕有心何處老仙求救世
刀圭倒盡藥囊深

碧玉高樓架紫雲世間應笑此樓深忽聞夜半鵬風起
九萬扶搖好在今

夫子當時見逝川一聲浩歎不知年東溟更比川流濶
不共東溟一派傳

和答姚主事

問我平生遺我詩清風明月想襟期此心若道元無事
似我江門看水時

雖乏向用之才忝有晦藏之地引步朱陵寄懷青
玉李拾遺徵之不至上疏何為張乖崖揀火事嚴
徒勞分爭因而有作

海北多年一釣船大翼遨空魚躍川盡言天下知音少
白雪不知何處絃

題健齋費子充殿元號

化機浩浩不曾停
剛見群龍面目成
誰道名齋無此意
江門月上看潮生

讀罷有感

坐掩殘書慨古今
白頭契分向誰深
頂門欲試回生手
爭得名家一寸鍼

海北汪廷舉新作懷沙亭修古書院冷香橋於海
上遣使歸圖并求慕竹樓記值予在病復以是詩

海邊西望海雲遮何處懷沙不見沙壁上畫圖君試看
冷香今日落誰家

忽然土木見經綸嶺海于今一使君忙殺多年簿書手
可能談笑起斯文

獨憐不見竹坡翁慕竹樓高月已空欲點山茅照西所
一瓢無計引春風

次韻送海北使阮刊

春日溪邊送阮郎桃花半落溪水香相逢休問來時路

金瓶梅詞話卷六
大舶不知何處洋

次韻李子長寒菊

四尺霜莖一寸葩幽香何只暗浮丫借令歲晚無人見
不做人間九日花

水北一叢含數葩梅梢寒月過籬丫茅茨可儼從人愛
不賣廬山半畝花

羅服周呈所作丁知縣祠詩因憶舊臘寄示菊花
諸詩比今為又長一格賞之以詩

醉舞黃花落鬢毛當時詩語太矜豪
春風再詠甘棠下
又長黃花一格高

鄧秋波六十一偶失一賀小詩索笑

六十光陰一鳥過一瓢還許醉秋波
只今那有茗溪叟
日日尊前聞放歌

寄吳別駕獻臣

一官萬里向西行雪錦樓高別駕登
若問野人何處所
朱陵洞裏白雲層

羅江許薄偶然逢又得成都一信通
惟有大厓李居士
洞庭何處醉春風

贈烏文瑞

回首長汀路幾多
琴書又打鐵橋過
趨庭若問東南事
曾聽江門一放歌

某昔過淮見平江總戎禮遇甚至都閩王侯厥配
陳氏於平江總戎戚也一日過予白沙相與道舊
平江今為天下兵馬元帥相去萬里無由幸會雖

隱顯殊途然於公之舊德未嘗一日忘也因事賦
詩托侯為達之詩曰

不見平江十七秋春風秋月夢何悠病中忽見東床面
却憶淮南是舊游

和答王僉憲樂用

春在城中不見春城中春不是長春湛生羞作春風面
故向人間更避人

靜處春生動處春一家春化萬家春公今料理春來處

便是乾坤造化人

春王正月衆家春望柳尋花我自春先生欲學程明道
莫厭尋花傍柳人

一物春知物物春一年春亦萬年春總在乾坤形氣內
敢誣當世謂無人

寒江獨釣

我道非空亦非小萬事含旃終未了朔風吹雪滿江天
我只弄我桐江釣

杜甫遊春

碧柳黃鸝三月畫江湖風雨萬篇詩
花前濁酒不得醉
驢背春風空自吹

秋江晚渡

扁舟何處渡長津水濶烟生不見身
莫向西巖斂高楫
天涯時有暮歸人

莊子觀泉

珊珊瀉下天花爛
仰首白龍高十萬丹青已會識者心

誰道漆園非具眼

答石阡太守祁致和

六年飽讀石阡書習氣于今想破除
雪月風花還屬我不曾閒過邵堯夫

程節婦詩鍾氏狂客之女

風俗當年壞一絲直到于今腐爛時
欲論千古綱常事除是渠家節婦知

贈按治侍御王公哲

明朝騁馬又何之眼見東巡西怨時短歌忽被風吹去
都落人間作口碑

偶得

白雪陽春誰會彈莫愁天下賞音難江門夜半看明月
想到朱陵青玉壇

朱陵我居青玉壇五岳雖雄無此山鍾期老仙還未還
高山流水我須彈

次韻送陳秉常之荆門州任

不辭遠道赴荆門，不避兒童笑稗官。
閒望白雲飛綵水，脚頭落處洞門寬。

紫蓋垂陰宿霧收，下臨雲夢此何州。
黃鶴飛來一回顧，不盡荆門天際頭。

得手未償燈火債，設心豈異賢良科。
世間膏火煎熬外，無奈箕山處士何。

題山泉為林節推

高厓百丈到滄溟，咫尺寒泉萬里清。
若道眼中惟見水，

老狂何意向詩傾

吳瑞卿送菊用東坡韻答之

江山搖落見霜葩
枕畔香風到細丫
不是先生愛孤寂
人間回首已無花

題畫雲窩

若個丹青可此翁
雲窩自有主人封
扁舟一去無踪跡
黃鶴樓前望五峯

送人

寒水江門可半篙漁翁江上理魚舫狂歌欲送夫君別
却顧樽中無濁醪

次韻張廷實見寄

兩脚著地此何關白雲與爾同去還正當海濶天高處
不離區區跬步間

歲月人間古又今斯文興廢遞相尋崔嵬百丈皆平地
西上一筇何處深

黃別駕報世卿將來白沙

君去廬山幾度春君來不來桃花新花日喜逢黃別駕
共對廬山說故人

送陳仲治用舊韻

萬言策進大廷對三百人爭甲榜名醉放漁歌此相送
白頭閒動少年情

久病吟

梅花未發先局牖落盡梅花未整巾明日廬山春又至
伴眠樓上歲華新

卜室大雲山

雲屋久住大雲山我亦雲中借半間未愁此地雲封淺
擬帶朱陵一洞還

縣送春至

四角圭田酒入唇長官送我意何勤莫言自有長春在
也共人間一歲春

謝伯倚得孫送薑酒至

七十一年雲水中半江老隱舊知儂一杯引滿為君喜

伯倚今朝又作翁

漫筆

一蓑春雨江門釣萬里長風海上吹南岳歸來無一事
小廬峯頂臥觀時

喜聞劉亞卿得請還東山

平生畏就人間飯向晚還同此鶴棲今夜開懷看邸報
東山歸臥祝融西

觀時

山雲將雨過桃溪晚脫萬紅何處溪年光也逐溪流轉
已送啼鶯過隔溪

寄陳仲冶金臺

萬里傳聲仲冶裘上林春好任郎遊而翁八十二春秋
浩笑江邊碧玉樓

憶世卿

楚鄉迢遞廬山春君來不來花又新引筇踏爛廬山月
折得梅花懶寄人

題湛民澤家廟

忽然突兀見新堂
遠抱飛雲萬丈光
主翁合是比閭長
此地還成禮義鄉

張廷舉送薑酒至

七十謬為人所尊
直從西域到東墩
一杯引滿為君喜
廷舉今年始抱孫

別廷實張主事

萬丈祝融何處山
三年碧玉夢相關
多少畫工傳不去

都沒賢今畫幅寬

寄題五峯為葉本厚父作

清世誰堪住五峯
石床三尺白雲封
祝融三畝終留我
略與先生脚板同

扶溪作飯江門喫
五峯丈人予未識
何當坐我五峯前
共對梅花說周易

贈張不已

不已心期不已知
明年八月戰秋闈
摩天氣吐三千丈

蟾闕高扳第一枝

感事呈宋督學先生

祿位升天元有命
情懷化俗却無醫
道不易行休怨己
仁非可讓更由誰

寄廷實主事

豨簽鼎內還丹意
枳殼墟邊待酒心
明朝許約西遊步
一寸豨簽地萬尋

和答林方伯待用春日見寄

對花把酒春無幾，寡欲安心老合知。
病過冬春還引望，中天月色幾盈虧。

舊雨春歸鶯不知，雨情鶯老落花時。
月露滴開鶯眼膜，乾坤不了一盈虧。

答陳靜軒過訪

公是登堂拜母人，往來不倦拜丘墳。
通家無論鄉閭舊，八十頭顱事事真。

丁長官祠示里人

古人冷淡今人笑

此黃山谷詠徐孺子祠詩也

此義足起人聞聽莫

遣藤蘿終得意頰令簫鼓不聞聲

寄李白州都憲

東南遺愛望重臨萬里滇南恨正深
引領東山歸去路騎牛跨鳳許相尋

諱日有感

十二月逢哉生魄江山為爾生
愁色黃昏庭樹烏上啼一聲何處江樓笛

送梁宗烈赴春試

夢入天門看春榜榜中不記狀元名世間此夢真何夢
說到梁生似有情

君持素履向朱門五色雲中見至尊且莫輕言天下事
須將風俗究根源

枕上

仲尼不作周公夢天下共嗟吾道衰總為乾坤元氣薄
聖人誠處衆人知

與張東白

入忙揀火張忠定正遠飛章李拾遺何故山人都
不作
山人貪睡起常遲

答陳中貴見訪

積歲江門幾度過不將錦繡薄藤蓑雪坭鴻爪他年夢
記得漁翁此放歌

題慈元廟呈徐嶺南紘

前有東山後有徐慈元風教萬年垂嶺南他日傳遺事

消得江門幾句詩

江門釣瀨與湛民澤收管

小坐江門不記年
蒲裯當膝幾回穿
如今老去還分付
不賣區區蔽篋錢

皇王帝伯都歸盡
雪月風花未了吟
莫道金針不傳與
江門風月釣臺深

江門漁父與誰年
慙愧公來坐榻穿
問我江門垂釣處

囊裏曾無料理錢

達摩西來傳衣為信江門釣臺亦病夫之衣鉢也茲以付民澤將來有無

窮之託珍
重珍重

與湛民澤

六經盡在虛無裏
萬里都歸感應中
若向此邊參得透
始知吾學是中庸

江門釣臺

何處江邊著釣臺
楚雲溟月盡收回
若比桐江還勝槩
千年埋沒一朝開

再用韻與湛民澤

日斜劉九放船回層起江門水底臺浩浩碧波山鎖斷
潮打屋門兩扇開

民澤祖樵林居士構堂於上游庄民澤乞題

入雲堂構昔人開蘭桂香風次第來黃雲山高幾千丈
後山前日寄聲回

次韻張廷實讀伊洛淵源錄

往古來今幾聖賢都從心上契心傳孟子聰明還孟子
如今且莫信人言

曉枕

聖賢都從一上來時止時行道與偕若使舂陵為孟子
光風霽月更襟懷

漫筆

浩笑江門點舊詩詩中幾度見承箕他日攜書南岳住
却話山樓浩笑時

贈楊中順德楊明府之子

山下柴扉不浪開楊生端為老夫來欲報封君無一事

金瓶梅詞話卷六
只將枉句贈生回

哭景暘

詰杙為楹四十秋，纔醒一夢便長休。
名登鼎甲死亦枉，老撫諸孤病只愁。

影翳山樓痰吐夜，寒生老屋病交秋。
渡中短紙誰封附

遠大為詞解我憂

廷實有疏

聞東山先生得請歸賦此

青玉之壇橫素琴，絕無人地五峯深。
碧雲鎖斷元無路

東山東山何處尋

問馬默齋病於其姪孫馬大年

荔顆紅時酒正多
口瘡不飲奈公何
郎君解記春牛否
還為而翁一放歌

林僂貢士入京告行于白沙贈之

乖崖掾火出人間
造次來分太華山
收拾如今到山處
明朝不見藕如船

枕上謾筆

正翕眼時元活活到敷散處自乾乾誰會五行真動靜
萬古周流本自然

答容彥文見訪

裹糧縛鴨問廬山久病勞君每厚顏若問廬山近來事
重陽過後菊花殘

次韻東所見寄

若水清風當穎出山人莫道不前知拍手江門春信早
黃鸝飛上綠楊枝

答文定上人

千金帖子忽飛馳
洗手開緘只汗頤
前代昌黎今我是
恍然海上記留衣

神交今在識荆前
再結前生未了緣
果蒙道力相扶起
蚤晚東林對長官

鍾太守美宣輓

詩人自古例多貧
恨殺滇南金帶新
公與定山貧到老
已有陳黃一輩人

天下功名無我關，只緣我自愛江山。
若對江山元沒興，紙錢灰冷未知閒。

夢遊衡山過南極數老人來過，却須先生作主與。
諸老對酌洪崖壽崖在旁歌，詩以侑觴合坐皆喜。
予以詩一首識興云。

衡岳去天能幾何，一株松下月明多。
南極老仙騎鹿過，一瓢斟月兩崖歌。

題任明府思親樓卷用定山韻

人間何處不樓居亦有如椽大筆書定山丈人都不管
一拳不屑老何如

碧玉樓畫夢扶病出遊村徑甚適忽安福羅進士
攜彭秀才來訪遂書以贈之

春早春寒著莫人黃鸝轉處暖初勻狂心剛被風吹動
走遍南垞到北津

泉石為順德張氏題

江山幾處堪還我泉石邊頭合有人高著一雙無極眼

閑看宇宙萬回春

羅浮春寄民澤

海上花開萬玉林
閒門碧玉夢相尋
不知開處花多少
折盡羅浮半夜心

九肋蹠蹠清楚濶
九苞真與黃雲深
復有鳳凰山上月
遍照羅浮玉洞春

陳海蓬諸子冠畢來見贈以詩

兄弟參差作雁行
春風碧玉喜同登
近午天風吹雁去

翩翩吹入紫雲層

周方伯至白沙

天上客來尋故人
江門月下足音聞
便傳一點江門信
逢著桃源且問津


偶得

一碧光橫南岳前
靈壇秋玉青相連
道士來攜三尺木
高山流水一聲絃

答送茄瓜

兩頭肥綠壓肩斜五月江園始送瓜童子近前與翁語
小籃瓜底是新茄

同將形色委人間竊比高松一鶴閒口腹累人都未免
茄瓜籃裏又詩還



陳白沙集卷六